



Komunikadu Imprensa
Tribunál Distritál Dili
08 Agostu 2022

Inspesaun ba lokál-du-krime no rekonstituisaun ba faktu iha kazu omisídiu importante tebes hodi bele asegura prova sira

Iha loron 26-29 Jullu 2022, Tribunál Distritál Dili julga kazu ida ho tipu omisídiu simples, tentativa omisídiu simples, roubo no danu ho violénsia (nú prosesu 3098/10.PDDIL) ho agenda produsaun ba prova sira. Durante produsaun ba prova sira ne'e, JSMP nota katak deklarasaun ne'ebé mak fó husi lezadu no depoimentu husi testemuña sira hamosu dúvida ka iha diferénsia ka la hanesan, liuliu relasiona ho informasaun sira iha fatin ne'ebé krime ne'e akontese.

Alende ne'e, juis sira mós ladun haklean sira ninia pergunta klarifikasaun sira. Ho nune'e, tribunál la bele hetan informasaun ka evidénsia ka prova sufisiénte hodi ajuda juis sira bainhira foti desizaun ne'ebé justu ba kazu refere.

“JSMP apresia esforsu no serbisu tribunál nian atu fó justisa ne'ebé justu ba ema hotu tuir Lei, maibé relasiona kazu omisídiu no kazu sira ne'ebé ho nia kompleksidade boot atu deskobre faktu sira JSMP husu ba parte tribunál atu halo mós inspesaun ba fatin akontesimentu ka lokál-du-krime no halo rekonstituisaun ba faktu hodi bele iha informasaun sufisiénte atu bele deskobre faktu sira,” dehan Diretora Ezekutiva JSMP, Sra. Ana Paula Marçal.

Objetivu husi rekonstituisaun mak atu fó deskrisaun kompletu kona-ba akontesimentu aktu krime ruma ho meu arguidu prátika filafali maneira ka forma oinsa arguidu komete krime hasoru vítima nune'e bele konvense liután tribunál kona-ba verdade husi deklarasaun arguidu no testemuña sira. Rekonstituisaun ne'e, ajuda tribunál sira hetan prova sira.

Artigu 116 (alinea h no i) Kódigu Prosesu Penál (KPP) kona-ba meu-de-prova admisivel iha lokál-du-krime (h) no rekonstituisaun-du-faktu (i), hateten katak bainhira iha produsaun ba prova la prodús prova ne'ebé sufisiénte atu kondena arguidu sira no deklarasaun ne'ebé arguidu sira fó la sufisiénte tribunál presija halo inspesaun ba lokál-du-krime no rekonstituisaun ba faktu sira hodi deskobre faktu ne'ebé loos.

JSMP apresia tanba durante ne'e iha kazu balun tribunál halo ona inspesaun ba lokál-du-krime hodi deskobre faktu sira, maibé ba meu de prova rekonstituisaun ba faktu sira, tribunál ladun halo.

JSMP rekomenda ba tribunál atu kontinua halo inspesaun lokál-du-krime hanesan durante ne'e tribunál sira halo ona ba kazu sira no mós rekomenda ba tribunál atu hahú

halo rekonstituisaun ba faktu sira ba iha kazu omisídiu ka kazu kompleksu sira, nune'e bele hetan prova sufsiente hodi ajuda tribunál foti desizaun ne'ebé justu.

Desizaun ba kazu ne'e sei hala'o iha loron 02 Setembru 2022 iha oras tuku 16:00 lokraik

Atu hetan informasaun liutan favór kontaktu:

Ana Paula Marçal

Diretora Ezekutiva JSMP

Diresaun e-mail: ana@jsmp.tl

Website: <http://jsmp.tl>

Rua Beco Lakateu, Aldeia Manufuik,
SukuColmera, Administrativu Vera Cruz
Dili Timor Leste
PoBox: 275

Telefone: 3323883 | 77040735

www.jsmp.tl

ana@jsmp.tl

Facebook: www.facebook.com/timorleste.jsmp

Twitter: @JSMPtl